




朝

鮮

人

詩





燕薊風煙

濟橋別席

朝鮮李肇源 著

萬里三韓使長程始此橋離杯當落日征蓋入寒霄
諸子自厓返孤懷出塞遙幾微應外見方寸自搖搖
臨津

昨夜西風捲地回冲冲舡路劈冰開闌干不待遼河
飲已覺寒威逼骨來

之二

花石前遊歲幾回巖香尚記擁舡開今行駐馬空亭

下惟見冰漸拍岸來

松京感吟

歷歷松京路於今幾度來寒烟生廢郭落日滿荒臺
每有山河感無端草樹哀不堪頻吊古孤坐喚溪盃

葱秀

聞昔朱天使停車到日斜玉泉傳舊號石刻耀皇華
癯瘠晴留雪危峯冷斂霞行行飄白髮歲暮向天涯

箕城

千年箕子國西門之鎖鑰長江抱城去樓觀連雲矗
十里長堤林一望迷紅綠舟車大都會民物宜庶繁

居人與過客燕遊無朝昏盤中酒肉堆舡上笙歌喧
四時俱適宜誰人不沈酣緬昔朱蘭屺詡以小江南
吾行值盛冬栗烈寒威酷饕風結層冰積雪埋大陸
披裘上樓望風物槩可想花撲白獸樽月滿青鳧舫
倒影出亭臺浮光炫綺羅江山亦尤物從古移人多
誰謂有美堂我日銷金鍋

肅寧途中

小雨箕西路勅風慈坵城山川依舊面雲物屬新晴
遠渡層冰合穹崖尺雪盈敢言行邁苦衰病只關情

百祥樓

危欄百尺古名樓樓下滔滔薩水流朝氣朝昏寒雪
下荒烟西北亂山稠川原繚繞方遐賞雲物凌兢忽
遠愁賴有主人勞病客綠樽紅燭且淹留

送歌妓還箕城戲贈二絕

尚有風情似少時淒絃艷曲若相期吾行不是清淮
路底事朝雲欲遠隨

其二

無多此別莫深愁鴨水春生漾綠流一笑相逢江上
路早花橫插玉搔頭

博津

古渡冰千尺遙山雪四圍塞程行漸近家信到何稀
殘郭纏衰草長亭掛落暉別來京洛夢回首已依依

贈李士賓

觀夏

兩家敦世好千里况同來有是紫芝宇兼之白雪才
長途酬短句寒夜遞深杯談笑相爲樂羈懷賴爾開
士賓贈麟兒詩語多屬我口呼次之

有鳥在深林邈焉寡其儔小鳥鳴其傍嚶嚶何所求
世降友道衰肝膽吐與疇去觀燕趙市倘有其人不
幸與之子遇携手入中州有詩可相和有酒可相酬
鍼芥自然感一見揩青眸知爲故家子踈曠信風流

與語叩所存聰穎學亦優少年志氣銳勉哉愈自修
青萍豈久韜櫝玉聊藏收其進莫可量日月寧我留
我兒得其友文墨與從遊况乎萬里行同樂又同憂
詞華足動人吾欲放一頭

東林

古院丹青落荒城水雪深山河經一劫天地屬窮陰
長物青萍劍輕裝玉匣琴白頭今出塞郵燭作何心

龍灣館

起拂征塵紫錦袍寒程晨夜亦云勞一旬身滯西州
遠千里心懸北斗高不斷玄冬風吼木無常白日雪

盈臯玉門春色何時見聞笛戍樓首更搔

統軍亭

四時無日不寒風盛夏猶然况在冬地勢城高窮髮
北江流界割大荒東鴨頭杳想春來路馬耳尖看雪
後峯叵耐九連城下野卧看星斗爛盈空

馬耳山名

渡鴨江

三江水雪瞥然過回望龍灣意若何渺渺冥冥看不
見黃蘆一色四圍多

又

十日龍灣飲今朝鴨水潄層冰依舊涉危岸若初臨

禿樹疑人立荒茅沒馬深從茲非我土長路若爲心
九連道中

金石山光鬱不舒完顏故壘雪晴初疎林若有人烟
起斷壠猶存井畫餘風氣雍容同內地城圍宏濶宛
遺墟自從鴨水分疆日虞芮良田惜兩虛

露宿夜次副使

百里無人境千山下雪時溪風吹徹骨磧氣逼皴肌
藉火寒差禦看星夜可知一燈明滅影天曙苦遲遲

又次

荒野相聯卧雙宵共一寒穿冰非敢憚藉雪若居安

何限殊鄉苦無如此日難溫存酬薄酒談笑強爲歡

安市城

鼉嶂環連勢插空千回石路一條通捷猿高鳥應難
度飛礮衝梯詎有功小將遂輕天下大文皇孰謂古
來雄賜縑知是牢籠手堪笑當年遠略窮

副使談夢戲以一詩嘲之

夜夢君何較短長斯須離合自無常花香引蝶神交
會盡角先鷄睡覺忙未必爲郎羞悴貌祗緣尤物換
柔腸請看老大河邊柳絮已粘泥不復揚

鴉鵲關

有比重關險當時在必爭開屯宜積穀匝谷可藏兵
郵傳盈千戶烟臺隱一城如今四海晏農賈樂羣生

遼陽

路轉山坡縱快眸崇墉額額鎮邊頭旗翻爛錦開新
市地撲雕甍認大州高士榻棲迷一壑仙人鶴影杳
千秋荒烟廣漠從何去只信車輪若水流

白塔

尉遲有古塔迺在遼城西氣勢壓全遼竦立與雲齊
何曾仄臺基但見剝檣題崔嵬十五級欲登不可梯
計許六十丈上層杳難睇八面諸佛像巧刻神鬼啼

昔應梵宇壯今惟野烟迷亭亭夕陽裏無數寒鴉棲

遼野

冰雪崎嶇峽路冥斜陽穿出萬山青忽當天地空明
界只見風雲變幻形千里渾疑凌泰岳一身方覺渺
滄溟塵沙漠漠無涯畔愁殺吾車幾日停

之二

風沙日日倦輪蹄四顧蒼然一色齊直是端倪無縫
合何曾尋尺有高低人行似蟻移時沒馬去如龍少
頃迷多怪天公偏造化亂山驅出海東西

望醫巫閭山

名山極北是醫巫疊翠如眉截一隅區割幽州仍作
鎮燕中自古帝王都

白旗堡次少行人

漠漠黃塵色荒荒白日輝衰年俱遠役病骨奈寒威
雙塔來微辨羣鴉叫迴飛長程劇愁絕暮雪又侵衣

遼路二十韻

七百遼東路艱難自古云迷茫沙磧畔嗚咽潘河濱
呵凍詩奚暇餐風酒不醺泥水磨膝脫朔氣逼膚皸
專對愁黃馘行程愧白紛悠悠冠蓋路細細表咨文
禹教覃遐遠箕封著恪勤河須憂遠役未敢恤衰筋

冰飲仍眠野晨征輒限曛山河方涉險天地忽無垠
一望荒烟冷無時亂雪零馬頭看落日車下踏飛雲
胃逆窪泉吸喉乾石炭熏店村皆樸陋塞俗少慇懃
言語終難解歌彈亦厭聞蒙駝且卧番狗鎖猶信
邊鄙稀文士村間盡甲軍柳榆標道路田澮備耕耘
民旣殷繁甚疆無外內分試看千里野羊豕動成羣

關外雜詠

蕭條八站亂山中冰雪長噓滿聲風差喜水泉清可
食燈前酒後喚茶童

之二

持齋風火
心目俱驚出谷時不圖空濶至於斯壯觀皆說遼東
野今日身經以後知

之三

彼鳥飛飛何所止浮雲起滅自其中若使步兵行到
此不知何處哭途窮

之四

兩行高柳勢逶迤千里濃陰一野垂賴此人無中腸
者至今行旅頌康熙

之五

郵撥跑來五騎連背齋公牒最居前遞傳一日應千

里瞥眼飛禽掠過然

之六

一斛汚邪數畝資馬通知是野田宜佃夫勤業無遺
利終日持籃馬尾隨

之七

家產貧豐計以牲朝朝出牧趁新晴牛三豕九驢爲
四店主猶稱下戶氓

之八

大車七馬小雙騾去去來來一路多惟見塵沙昏黑
裏游龍流水電翻過

之九

清心丸藥視希珍使路荷包自有真到處如雲求者
衆小囊那得悅多人

之十

大小村庄多梵宮尋常民戶奉關公偶看一處書堂
裏僻位文宣讀數童

之十一

太平車上繡帷開鬢插瓊花抱小孩云是歸寧他郡
女七年初見外家來

之十二

驟馬參差隊隊分槽頭植立寂無聞無端踉蹌吃嘶
響盡是吾東果下羣

之十三

貴家墳墓野田隅環以矮松十數株格局初非龍虎
勢堪輿論理也虛無

之十四

官人行色以車知一騎居前三騎隨繡帳琉璃明似
鏡箇中多是好風儀

之十五

大處行逢市日迴旗亭左右彩扉開不知塵野迷茫

燕窩屋
裏穿過人山幾疊來

之十六

閭陽屋制捨無樑瓦蓋茅鋪若掃場未見壁痕滲雨
雪不知何術禦床床

之十七

崩臺敗壘望依稀故道荒涼野鳥飛天下皆知松杏
戰前明時運已全非

之十八

蒙毳聯騎大橐駝背如峰出項如鸞直須任載行千
里全力能兼五馬馱

之十九

塔山東畔海連天堡戶人皆解操舡行路若逢清朗
日嗚呼小島出帆前

之二十

村店中間市燭明居人逐末起鷄鳴欲知恰似吾東
語來去街童喚賣聲

之二十一

雌形鴟吻殿宮儀在在皆稱關帝祠我道雲長天下
士誰將帝號妄加之

之二十二

南折長坡眼忽明蒼然入望海山清數村的歷寒潮
落點綴微雲島嶼生

之二十三

田橫孤島起寒風秦帝長城望眼中意氣男兒空自
笑白頭只踏一隅東

之二十四

姜女貞心化石蒼范郎消息竟茫茫寒山一片猶堪

語撐柱人間萬古綱長城之役姜女尋郎到此聞已
死大哭化為石有碑可攷

之二十五

左憑疊翠千山高南枕層溟萬丈濤第一關門天下

阨正東開處壯城壕

北鎮廟

巫閭氣勢若騰奔遮限窮荒地利存封十二時名始
著享千百載禮仍尊平收巨野何宏濶環擁群巒互
起蹲博得偉觀重到後向來風雨滿川原

松山堡

如此風沙路行人苦不休野長渾眯目村遠更搔頭
戰骨何年事狂塵自古愁涵涵水浪惡河渡莫遲留
塔山示少行人

河流冰底憑滑滑入愁聞車疾奚爲後杯溫欲與分

遠帆携返照古碣卧荒雲海色添詩料相酬到夕曛
寧遠州

風雪千餘里清暉是日程牛羊蔽田陌村市錯碁枰
商旅多停野民生不見兵百年休養地四海共昇平
沙河道中

遠渡水流互淺深邊荒天氣倏晴陰依林古寺塵偷
碧倚野行宮日耀金塞女能跑無勒馬市兒閒弄鎖
籠禽民殷物阜看如許唐宋歸來莫盛今

次蜀人李靜山 敦安贈別韻

輕車衝雪遠途來山海重關向晚開特地青眸如舊

識一樽孤燭許相陪

之二

蒼茫臨別問君家落日浮雲錦水涯笑把風霜遊子
袂寒絲新織木綿花

之三

塞草凋黃滿四原華牋領取德音尊雲山未隔相思
夢半夜鷄鳴度薊門

之四

千年小別塞雲天詩酒難忘半夜緣士有一言相契
合塵箱歸閱靜山篇

山海關

碣石東頭地遂窮重關表裏一何雄直連萬馬奔騰處橫跨長鯨出沒中第一門吞全野勢七重譙截大瀛風如今海內昇平久匝地烟花四望通關門扁以天下第一

澄海樓

臺隍千尺枕龜鼉携酒登臨意若何有眼始知恢宇宙無心自覺感山河層巒聳翠紆城勢落日翻紅盪海波安得宗生舡泊此長風共倚和高歌

紅花店夜行

落日紅花店寒風白石屯平疇埋雪徑昏夜失烟村

林閃孤燈影人疑老柳根回車尋宿處犬吠在柴門

永平府

遠客將晨月荒城右北平蒼蒼沙磧氣咽咽隴灘聲古戍行人少遙村斷靄生山南有虎石奇蹟問歸程

榛子店

康熙間我使過此壁上有詩曰椎髻空憐昔日粧征裙換盡越羅裳爺孃生死知何處痛殺春風上瀋陽下書曰奴江右虞尚卿秀才妻也夫被戮奴被擄爲王章京所買將往瀋陽灑淚拂壁書此望天下有心人憐而救之

下書年月日又書季文蘭三字墨跡如新問
於店主店媪具言五六年前瀋陽王章京用
白金七十買此女過此悲楚悽黯之中猶見
其姿容美艷舉止端雅書此而右手倦則左
手執筆疾書字無異同見甚可異遂愛護此
壁云東使歸傳此語東人多有詩悲之其後
東使之來每尋此舍見壁詩而還至乾隆初
猶有壁字之依稀可見今則遍覓而不能得
殊可傷歎

居民誰識季文蘭野店今無壁字完東使遠來尋古

跡青山不語白雲寒

豐潤城

文昌小閣上崔嵬雲物西南滿眼來市里繁華帝里
近古人寂寞今人哀荒山石老昭王墓大野烟迷郭
隗臺一任寒風吹客袂自然懷舊久徘徊

玉田

盖有崆峒種玉僊薊門東畔亦藍田微茫遠對看銀
海莫是輕盈暖日煙

薊門烟樹

迷離是何氣樹底田畔在初疑野烟起更看水銀海

之二

霏微若雨濛泱泱如波瀕枯木光裏活土塊影中動
之三

畫圖不可狀言語未能形強欲形狀之演漾又宵冥
之四

如遠忽如近恍惚非意慮僕夫往而審却在吾行處
之五

昔人論此理海野氣蒸時何處無海野天下獨此奇
邦均店

關內猶邊土行程去去難塵纖堆鬢暗風峭透肌寒

憊極還無睡愁多轉減餐時逢文士語澁筆不成歡

燕郊堡夜兩次少行人

隔壁真如共枕情通宵笑語一燈明聯鑣以後初奇
事同聽燕山夜雨聲

白河途中

過此皇城里幾何萬檣如束泊水河山川不比荒陬
遠民物方知大處多繡勒北人皆白馬羶車西賈半
青驪漸聞殷地雷聲起石路鞅輪若織梭

燕京

管窺唯覺小乾坤民物殷繁未遽論鳳翥鸞翔皇極

殿肩磨轂擊正陽門範圍大矣根基固歷代因之體
勢尊莫道燕京邊塞近舟車都會即中原

玉竦橋

太液水流飲彩虹參差畫船崑西東境隨步幻來瑤
樹眼與神迷聳貝宮縹緲烟霞三島象平鋪羅綺十
洲通僊居未必能加此想見淡春映綠紅

偶吟示少行人

東人元坐井今始大觀之金闕神恍惚繡街光陸離
禽鳴鸚鵡慧獸走象駝奇最愛花千本爭開雪白時

太學

遊子資章甫來尋太學路道殫廟宇廣松檜苑交互
辟雍與橋門周漢舊制度穹碑十三經長廊序百數
魯齋手植槐霜根積風雨東西交柱木猶爲後人護
况此周石鼓愈古愈愛慕蒼苔雖剝蝕籀字尚可句
憶昔避秦氛不爲災火誤理豈終埋沒今焉復收聚
顯晦各有時摩挲千載溯

文丞相廟

萬古文山廟三韓使者過日星瞻正氣天地動悲歌
生死成仁已興亾奈運何臨風無限感獨立夕陽多

盧溝

浩蕩黃流流四時遙通河脈定無疑無端更渡桑乾
句蓋自童年誦此詩

琉璃廠

百隊旗亭十里長繡街闐咽彩輪忙氣蒸烟火冬無
涸香散綾羅陌有光四海貨珍都會處八方人士倦
遊場此來莫飲貪泉否萬種牙籤羨錦箱

葉雲素

繼受

以集句詩一篇寄贈卽賦四言四

句以謝

文章有神交道攸存未覲良範先贈以言黃鳥出谷
白雲在園炯炯相照豈終可護

雲素宅有井子午二時甚清冽餘皆濁澀誠異
釐也賦一律以呈

聞說平安館通靈潔釐存宵中來活脈晝正動清源
燕土泉愁涵韓人肺苦煩烹茶聊一試爽氣覺惺昏
次胡默軒九思寄示韻

獲茲金玉音三復自起惰得君良驥附作我病鼈跛
題韻松箋潤呼僮錦帕裹靈襟冰澹澹笑語春娜娜
推詡太不穰此心豈安妥自有薰葭懷已改榆柳火
星河薊門北雲樹滄海左懸懸勞夢想談論儘多可
勁毫蛇龍奮圓軸犀貝夥館燭况照耀遼雪更吹簸

慇懃寄送緘迷茫傳未果
淡悵惱遠人後期戀老我
鏡鬢雖白紛星眸拭青磨
因風而續貂能領此心荷
用聯句韻示雲間周菊人達

三韓迢遞路車轍又燕山
一士初傾倒孤居遂往還
點犀通海外飛鶴想雲間
賴有源源樂羈窓却遣閒
菊人示看山讀畫樓詩帖
多有海內名士題詠
要余一詩遂忘拙書於帖末

三泖九峰未曾覩只憑畫圖得
一斑畫圖如此况真境
勝地想見超人寰山形水態皆畫圖
聞君起樓於其間變滅汀烟一床濕
拱揖峰雲四簷圍晴窓隨意

卧遊樂安得携手去共攀羨君如此江山圖
怪君風塵猶未還仍憶我家紫芝居
臨流有樓堪投閒聽鶯檻挹春山翠
打魚舟橫秋水灣我亦看山而讀畫地
境雖殊趣一般談龍不如喫猪真且歸
看吾畫裏山

陶然亭

古塔風烟積平郊草樹稠山河一氣壯
城闕半空浮喚酒寧辭醉吟詩反惹愁
客懷無處遣春日薄言遊

南海子

垣圍遼濶洞逶迤林藪陂池又一奇
梵宇僧誇新駐蹕塔臺人讀舊題詩
隄花未吐風光早石澗無聲雨

澤邊剛恨吾行難再至滿前紅綠失春時

岳王廟

城隅遼落一荒祠公跡何曾到北隣聞說西湖遺墓
在至今松栢盡南枝

之二

東窓夫婦銅爲像繫蹠庭前左右羅此事休論真與
假看來贏得快心多

疊次默軒

春陰作輕寒閉戶養病惰風聲入枕邊恍然起聾跛
故人寄詩至忙開瓊函畏庾生蓉水淨張緒柳風娜

掀髯百回讀遽爾沈疴妥清覺牙留香爽知腸失火
摩挲一幅箋朝夕張壁左淡眷儘藹然拙句况印可
夜夜虹月輝盈矚不嫌黦譬之眷裏米愈精在愈簸
充然若有得不食腹猶果遲日燕山春高談宵裘我
懷哉那復見雲宙青只麼一年一度書勤意斲得荷

次別保太青 大章

江表多奇士賓觀在國光談諧疑舊識詞翰煥新章
遠客雲千里伊人水一方相思那復見左海近扶桑

次別樊志華 景卿

拭青傾蓋地浮白瀉襟時一別三千里清儀夢不遺

之二

豈須曾相識所貴在輸心一曲鍾牙意山高水亦深

之三

吾衰行路倦重會詎相期萍水男兒事猶餘一念癡

之四

莫恨功名晚高才尚盛年冲霄一奮翼雲路定多緣

歸期因事忽退愁苑有賦

片雲天東去去意何其悠山河非我美日月從他流
使事苦未竣五旬久淹留出門既無適在寓亦隘湫
厨人告絕粮從者皆懷憂橐空猶市買壺乾與誰謀

西風日夕起寂寂孤卧愁覽彼高飛鳥翱翔得自由

別雲素

神交疇昔以新詩既見而歡未見思古貌古心今始
得此生此世更難期金蘭結契吾何幸石磬遺音孰
有知惆悵虎方橋上月隨人千里影遲遲雲素壁上懸古磬

菊人見余書篆隸賦示一絕遂次之

尋常筆法只如如却訝金臺覓劣書百軸剡藤堆似
雪清緣翰墨若占初

疊次

濡毫真是畫葫如十駕難追古法書枉被江南高士

賞雕虫不負習來初

別菊人

曲巷移車款竹扉
雨餘春物正芳菲
主人謀醉不成
醉客子言歸
今始歸河上
論襟風在木橋頭
分手月生衣
那堪一別終千古
重疊湖山夢亦依

回程

晚向朝陽路
翩然氣自舒
五旬牢蟄久
長日困眠餘
晴景禽聲滑
輕風馬首噓
心忙先戒僕
其驅莫徐徐

通州

粉堞周遭面水涯
東南又一大繁華
紅亭樹掩千家
靚錦纜風牽百丈斜
市燭通宵明似晝
牙檣迎旭東
如麻停驂爲愛江
光豁春水連空落
早霞

潞河

潞河舟上酒初醒
回首長洲步步停
日晚烟波延遠
矚春晴冰開瀉
新聽玉驄銀勒城
邊路翠幔朱欄水
畔亭富度燕京
猶市里不如清曠
此江垆

菊人有送別潞河之言
余到通州菊人典衣雇
車而至意何勤也
又袖贈別詩遂次韻申別
鎮日羈窓酒幾鍾
交情別恨暮雲濃
吾身可使浮萍
者容復風頭水面逢

其二

玉寶臺前野欲窮，心隨河水日流東。
江雲渭水猶同域，蓬海三山泐九峰。

其三

街鼓何忙報五更，離筵揮淚一燈明。
此時心緒君知否，看取風前不繫旌。

其四

畢竟通州送我歸，朝陽門外轍如飛。
須知此別香千古，雇得征車典婦衣。

盤山

白石蒼苔洞路分，山僧不惜導慇懃。
遠來鞍馬爲奇賞，久坐林禽多異聞。
新茗藉泉添爽氣，古松因地出晴雲。
仙人劍跡無由見，未到中盤日已曛。

薊州

層城高不極，雲物薊邱春。
北地千甍屋，東人一幅巾。
英豪烏過目，王霸骨成塵。
吊古無懷古，因之眺望新。

漁陽

有風從北陸，將奈遠程何。
只見狂塵漲，如聞突騎過。
長橋河道改，故壘夕陽多。
辛苦此形役，空慚兩鬢皤。

歸路十韻

試看歸時路來時迥不同芳郊消積雪嫩柳任輕風
觸目隨車轉排愁覓句工濠梁流水上澤笥滾塵中
陰坂穿泥濕陽岨踏草豐團沙修屋蓋疏土始田功
男脫重裘白女纏窄袴紅物華驚序換鄉夢悵書空
鳥語聲聲碎河流在在通也知千里野依舊浩無窮

夷齊廟

北海非周地西山盡首陽相望孤竹廟猶記墨胎鄉
袖若清風襲盤疑春蕨香白衣殷制古東士感偏長

灤河

翠壁行宮側蒼松古廟陽水流如乙字風起自申方

舟楫今初見山河無限傷低徊遲解纜汀柳繫春光

二月初十日灤河石上示少行人督和

臘月廿八盈盈酒厨人介我生朝壽醉夢才覺晨鮮
豐副价生朝又廿九兩使生朝連兩日此事燕館諒
非偶又問生朝少行人仲春初旬月宿斗三人同作
萬里行各遇生朝誠稀有是日適次夷齊廟高臺共
挹清風久波淨灤河數細魚春入首岑吹高柳郿峰
臚酒潞西香佐以薇羹風味厚百年此日那可忘客
中初得笑開口

射虎石

大黃弓鞘拖腰間醉眼迷離意氣還恰是荒林微月
夜不然山下一頑顏

羊河道中

朔氣吹沙起春陰接地垂池鷺眠自穩野鳥影何遲
程道三千里羈愁十二時歸心同此水日夜與東馳

文筆峰

滾滾塵沙路幾重昏昏鞍馬苦無棕忽聞從者驚相
叫碧出東南一朵峰

出關

征袍起拂塞塵黃滄海城頭照夕陽似鳥脫籠天漠
漠如魚縱壑水洋洋紅花古店春將爛綠樹秦京路
許長默計歸程猶未半重關一出意逾忙

小松嶺

山海逶迤路輕風欲透衣直愁征馬倦空羨去鴻飛
塞氣春猶厲晨程露未晞迷離車上夢多是故園歸

東關驛

一帶明波散客愁魯連滄海意悠悠雲陰欲作崇朝
雨風氣渾如八月秋堤柳失青塵暗羃沙田淘白水
交流途中却得閒中趣驢背吟詩到店頭

李靜山來訪店舍贈一律以別

蠶叢鯨域各天涯風雪郵亭邂逅奇萬里忽看春色
至一宵不爲別筵遲孤燈話爛吾將去薄酒情淡子
莫辭祗信靈犀遙照炯此生倘有再逢時

寧遠州滯雨

塞氣疑爲雨霏霏撼曉眠屋簷交雪下牕紙任風穿
泥土應三尺羸驂奈九顛行人添一惱此日長如年

愁坐漫賦

豐潤張郡峯好箇老成人教授居縣學文墨與爲隣
幾微無怨尤白首甘沈淪床上羣書積座側古器陳
就中名牛鼎制度疑先秦出門重莫動千年若有神

路西鑽壺香贖我風味醇一年一書約摻手語申申
之二

溫泉久有名歷路住吾車野逕何逶迤地勢何汙窪
上泓蒸出氣蟠作東蒙霞俯視石欄下亂沸騰泡花
立爛敬宣藿瞬點陸羽茶下泓爲浴室引流石溝斜
東人苦痰癖一飲失沈疴僕夫患風濕一洗去瘡痂
有病輒奏效僧語非虛誇人有所不知庸詎非丹砂

之三

雲素葉老人遺我一晶壺其小不盈握中有蘭亭圖
出自閩人手精巧世所無曲筆入壺口丹青運排鋪

樹木湛精華泉瀑細縈紆泛泛水中觴少長咸與俱
款識十數行字畫又不僞是誠希世珍相贈意豈徒
思慮所不及莫或神鬼摹若不壺裏窺應謂吾言誣
之四

長春石牌樓上有鐫綸綍有人道其詳宜乎表其節
錦州村家女才色一代絕及笄結婚媾時年恰二八
資裝早已具日期方消吉急風吹寶樹弱枝忽先折
爺孃更議親女意還未察此心曾已許此身宜守潔
強之矢一死確然莫可奪咸稱寡處女青春至白髮
生長絕塞外貿貿掩蓬單安能有此識風聲遂四達

雖非禮之正可見其志壹其名曰法珠歸誦莫湮滅

連山驛

磧雪彌愁色邊雲易駁陰行征計日苦勞役惜年心
馬瘦蹒跚步轎搖伊軋音長途雖困頓時復發孤吟

大凌河

漠漠沙吹面湯湯浪打崖高原皆草莽白日忽風霾
陰雨聞啾鬼平田拾戰骸今宵將宿此吊古若爲懷

石店遇雪

徹夜凜風撼地號朝來飛雪滿荒皋吾行忘却携春
色認以玄冬朔氣高

之二

龍堆寒雪大如盤車牽方知去路難泥淖從他來日
事皓然千里即奇觀

閭陽

漸喜歸程縮旋憂寧路脩春深無燕子風厲尚貂裘
古驛今逢月何人共倚樓一樽聊自酌孤坐遣羈愁

桃花洞因風雨不得歷觀悵然有賦

桃洞禪扉悵未開路隅停旆為低徊谷雲巧釀迷源
雨巖瀑懸知滿壑雷聽失松風神獨送期虛蘿逕首
頻回武陵竟闕春消息底事今行若被催

廣寧

盡日凝冰路跳泥任濺衣浮雲寒作色白日澹無輝
瘦以吟詩苦愁因把酒稀從人思挾纊雪後又風威
士賓得柳絲初拂雨纖纖之句敲推車上車傾
見墜贈短律以慰之

次士賓原韻

柳絲纖雨裏何故立泥媿覓句方凝眺成醫幾折肱
騷人醉兀兀險路戒兢兢嘗盡艱難事方增所不能
斷酒非緣市味嫌吟詩只怕客愁添征鴻晨戾雲天
潤老柳春回夜雨纖澗土耕應牛力省溪泥沒更馬

蹄黏何當謝却迷茫野坐看峰陰積晚簷

登新店後小阜洞見遼野四無涯際

畜眼平生始見奇全遼天地縱觀時譬如蕩蕩平盤
上圓蓋穹然下覆之

白旗堡

東出朝陽東復東行行仍略海雲窮地形遼左看逾
下時候燕關迥不同程限二千皆濶淖番回升四始
條風吾鄉節物將何似柳眼深青杏眼紅

野中逢雷雨

野雲如潑墨風雨忽交馳未必方千里真能快一時

走雷殷石鼓飛電閃金絲幸復輕塵宿行人可忘疲

新民屯

泥濶新方路河深巨堡城野無遼豕白車盡陝驟青
老婦簪花插穉童烟竹橫土風看已熟來往半年經
孤家庄曉發

之二

遠鷄近鷄鳴小星大星落催車向東去東方天欲白
殘月光有無浮雲時散聚不有兩行柳難分田與路
之三

四畦皆錯繡一路如新耕前車復後轍此路無時平

之四

牕紙通宵號昨風今不止忽驚當遠山乃是寒雲起
之五

紅日出野田野田紅雲遍吾王隔歲顏今日天涯
見

瀋陽途中

四顧惟看地接天蒼然積氣又蕭然何人名沒苔中
碣朽骨耕深戰後田寒苦向來頻虐雪清明時節但
荒烟邊兒爲說車前路更有灘泥及馬鞭

渾河

擊柝城鴉散驅車野靄空白餘關塞月青裊酒旗風
草樹三春色山河一夢中試看雙鬢雪誰道較前同
之二

客路晨昏作天時冷暖調長河水已泮遠戍雪方消
北送鴻飛迥東瞻馬首翹何須招舟子撐木有完橋
太子河

燕丹逃死此水濱自誤荆卿又誤人咽咽寒波鳴落
日似如遺恨失吞秦

山腰舖

車坐三千里衰翁脚力微久飢寧擇食多病未更衣

驛路連春草河流漾夕暉從茲分峽路行旅漸看稀
舊遼東路上

寒水飲盡又荒塵白首胡然飽苦辛萬里未逢天下
士半年空作路中人支離大野將窮日斷續浮雲欲
暮春病肺未蘓泉味惡堪憐藥餌久隨身

記見

有女將二子共騎無鞍驢抱兒坐之前兒方三歲餘
大兒坐母後來自何村間驢小僅如狗馳驟任疾徐
坡路犖確處野泥浩蕩初橫竹又揚鞭其走風輪如
邊俗無男女嫺馭誠非虛

之二

舟次耶里江兩岸簇人馬渡涉有規度寂無爭競者
人以來先後馬亦量多寡東人多惡性欲先何意也
公然大喧聒仍以爭端惹那免中國笑躁擾且愚下
之三

村兒三四歲跳踉田畔春是日適微雨彩服汚泥塵
撒癡啼而入爺孃愛不嗔鼻凝黃白涕兩孔幾塞墜
纔拭旋復垂雙連上下唇何其似東俗不覺一笑新
迎水店

又釀春泥雨雲陰一野迷樹多蒼甲拆山或翠鬢低

裘弊憐捫蝨腸虛喜啗鷄店村遙入望疲馬亦長嘶
王寶臺

野路仍山路風花或雪花車前千疊嶂柳下十餘家
壤黑空蕪種原青長草芽始知經過處春色隔天涯
駐蹕山

百萬貔貅天策兵包山漫野摠連營如今四顧荒烟
裏何獨茲山駐蹕名

次少行人

濛濛半日雨泥路喚愁生田立耕驢歇林歸濕鳥鳴
燎衣圍炭坐覓句遶階行抵店頗存訊歡欣共苦情

狼子山

客子將寒雨前冬託宿村水知新甃味籬慣斷山根
峽路春陰重郵亭夕氣昏曾聞多惡虎申戎閉柴門
阻雨遣悶

春雨何其數羈愁滿野墟固知思浪費其奈意焚如
乍坐憑烏几旋興繞土除峽天穿望眼幾日後來車
鷄鳴寺

小寺山之阿尋古溪畔行寮依林樾邃樓臨田野平
居僧只三四見客欣相迎聞昔貞觀帝勤遠遂東征
房魏諫不入親將天策兵山野何崎嶇包絡爲屯營

朔風透御幕帝眠起五更靜聽刁斗傳耿看星河明
且問夜何其忽聞鷄三鳴邊荒無人境安得有此聲
試尋喔喔處却於高阜生土人以爲神就此立數楹
相傳一千年至今仍其名語既荒唐甚人或疑信并
惟茲林壑趣堪娛過客情

小石嶺

謝却遼河險仍尋嶺路艱峽雲明滅際峒日蔽虧間
只信雙旌去空携短屨還陌頭楊柳色回笑玉門關

甜水

峽流如鏡漾新春水際明沙澗照人忽憶靈芝溪畔

路斜陽捲釣數纖鱗

會寧嶺

林風一振響蕭蕭磧道餘寒雪未消燕北路脩行且
盡鴨東界近意還遙峰迴路轉三义水雨落雲飛萬
寶橋後到泥車消息斷不堪先自上嵯嶢

嶺路

巨野今已盡野盡復疊巘瘦馬蹄皆穿病僕足盡繭
支離此行役一枕愁輾轉所喜峽中路井泉極清淺
掬飲代香茗腸塵可洗遣

之二

清朝陟大嶺大嶺又當顛野雨旣沛如嶺雪復皎然
輝輝轉山晷藹藹生墟烟春冰豈停壑峽水盡入田
努力諸僕夫千山夕照前

通遠堡

去去關河曩看看道路催東風千里起北塞一鞭迴
鴉閃夕陽影山延野火煤家書尚不至愁上望鄉臺

八渡河歌

一渡河水最多融雪兼之雨滂沱濁浪混混流日夜
中有無數小盤渦

之二

二渡河水盈科無橋無舡可奈何日暮天寒病徒涉
邊兒睨笑鞭駿騾

之三

三渡河浪浸阿人從淺瀨迂回過忙中猶問春消息
獨柳荒墟影波婆娑

之四

四渡河漾白波石灘跳沫上濕鞞借酒欲敷憔悴貌
水風吹面不成醜

之五

五渡河上長坡衆山如束碧嵯峨停驂却愛風光好

水邊籬落帶女蘿

之六

六渡河水如羅峽裏春日儘清和靜立一鷺莫驚飛
我髮與爾同皤皤

之七

七渡河發浩歌水不沾衣人爭詫一行誰復詩思好
夕陽山色滿驢馱

之八

八渡河更無河快心真如體祛痾幽壑輕風最可意
四松之下且一哦

黃家庄

荒村依古樾小水繞長坡草色今如許水程曾幾河
刈柴男力作磨麥女工多風氣知相近欣然一笑過
松站得家書喜甚示兩使來和

家信從何至審知家國安世間無此喜今後且加餐
日月三邊久程途萬里寒春光浮在面面面笑相看
象兒生男喜次少行人見賀韻

無恠家書異域遲書來新喜有誰知一樽醉共家人
日春晚庭花子結枝

乾子浦

險路今焉盡輕風屬久晴車過虎狼谷馬熟鳳凰城
塞外經年客天涯趨日程春光隨處在山雉又新聲
鳳城
鄉思切切易傷神滯雨替泥更惱春路若已窮還異
域月今將改尚行人衣痕碣石三邊雪轍跡燕山百
丈塵安得一朝生羽翰翩然去濯鴨江濱

柵門

滯塞將旬日羈愁鬢幾莖停吟仍困睡斷酌自衰情
芳草綠堤遍春流與岸平巖花紅欲照和夢句還成
憶遠人

葉雲素 繼愛

篤好洛閩書天姿卽近道君子哉若人餘事煥文藻

胡默軒 九思

寒惟一布褐饑亦一簞瓢奇氣寓詩畫興到彩筆搖

李綸齋 恩元

一登汲古齋古器爛盈觀有書書未達斜日秣陵寒

李靜山 敦安

潼西逃矣人詩酒劇談笑天半峨眉月應分兩地照

葉東卿 志統

我愛謝家樹芳陰鸞鶴停年年有迴鴈尺素傳東溟

張郛峰師渠

停車豐潤署張老已言歸獨立看春樹孤吟惜暮暉

杜筠谷懷璞

郛峰不復逢筠谷又難作中夜起徘徊店月自寒色

周菊人達

面晤幾三旬筆談數百紙都門多舊知至契惟君已

慶春圃興

舊面如新面今歡加昔歡一年一度札留約報平安

樊志華景卿

丹徒一布衣漢落燕南市能飲即家風戲言曰壯士

薩湘林迎阿

不藉館卿貴頗款遠地人襟期儘樂易詩句更清新

釋三明

飛錫住春城惜哉相見晚辛勤送我程握手言由烟

姚琴舟景樞

跌宕西山廟周旋北海樽客燈情更厚車騎枉相存

陳萼林華

未叙新知樂徒傷此別筵相思萬里夢迢迢潞河邊

和雅敬

奇遇鄂羅人重譯猶聽瑩其意頗慙慙寶刀脫相贈

留柵遣悶

我詩如我行行止詩亦止冬春十旬日程道六千里
中間所覩聞何莫非奇詭詩料於斯足怒罵與笑喜
囊裏二百篇亦云富哿矣已嫌言重複豈惟困行李
羈蹤滯荒邊無以消長晷時復聊一吟自笑情未已
之二

去時只向西夕日車前橫來時只向東朝日馬首迎
去去來來路羞明傷我睛視昏比較甚花樹烟霧生
屋後一高岡理筇乘午晴疊巒遠且迷一野圓而平
傍有指點者龍灣白馬城如何老我眼視此獨分明

獵魚

夜有知時雨朝暉滿一川白翻魚穿柳青出野炊煙
終覺風殊域難爲日少年芝溪張網趣荒絕古關邊

野望

偶然川上望灣客滿春垆衣白多於黑崖紅幾半青
旅愁同黯黯落日每亭亭無處疏堦鬱臨溪獨醉醒
自川邊陟左麓散悶

纖雨空濛暗野垆東南多失好峰青愁人醉卧水邊
石向夕山風吹自醒

之二

持魚尾火
三十七
憶昔天兵東下路雲煙出沒萬峰高將軍一誓仍奇
績鯨海長清洗劍濤李公如松到此見萬峰出沒雲
將士皆泣公曰此汝輩封侯
地也士皆奮勇
遂成破倭之功

之三

一握菖蒲新出水數株楊柳蔭晴暉殊鄉節物看如
許更有斜陽雲鳥飛

之四

風風雨雨道途難倘及園花春未闌脫却征衣花下
坐一枝應亞竹欄干

川上

野綠原青草不齊人家分占水東西小桃折甲斜依
堯嫩荇如錢細點溪塞外春暉魚响浪峽中時序燕
含泥風光信美非吾土莫遣山禽百種啼

出柵露宿溫坪次副行人

春夜何其永長程始欲窮以吾今日快知子此心同
酸齒呵寒雪舒眉宿信風鴨江餘幾里逾覺意忽忽
九連野次少憇

此地曾吾境應容萬戶居諸山低蘊氣一水湛涵虛
可惜桑麻土如聞鷄犬墟今看寒宿處春樹已扶疎

愛河

雙袂僊僊若御風少焉當在鴨江東
長途愁緒知多少盡付荒山亂靄中

灣城

野靄朝仍豁邊風晚更輕汀花紅覆路
崖柳碧連城過境渾如夢迎人揔有情
笙歌東閣夜勞客倒溪觥

聽流堂

久抱幽棲志胡然事路歧當樽花窈窕
憑檻水清漪頓忘行人苦翻生靜者思
芝山如有此歸卧已多時

練光亭

一色澄波共霽天方春雲物畫樓前
江山麗景爭羅

綺簾幙清風入管絃遠水搖紅花在嶼
長堤蒸綠樹生烟四時何日非佳勝
月裏琴樽滿載舡

還家戲書

奚囊二百廿餘詩馬勃牛溲並蓄之
笑向家人誇所得燕山歸橐富如斯

此朝鮮使臣李肇源詩寫寄周菊塋學博者也周君名達松江人道光中葉秉鐸吾鄉跌宕自意嘗見其九峯三泖圖黃公安瀆題詩云君道九峯拋未得我拋三十六峰來自今回溯蓋六十年事矣此冊未少徵以贈一笏暇日展觀日記時光緒壬寅立夏日松禪老人



朝鮮未使每選博雅多能之士前乎此者金正喜李滌船後乎此為余所晉接者中君忘其名金德容皆表之者也其詩筆較此為勝甲午以後朝有絕矣趙國之張夜郎之大能無歎哉



